

范忠貞公文集

四冊之二

范忠貞公文集卷二

男時崇校字

浙閩奏議

請紓東南大困疏

具官

臣范承謨

謹

奏

臣

向在內院恭覲

皇上日理萬幾每

見必先

垂問章疏中有報水旱災荒者否有則

披覽不置

憂憫見於

天顏無非以民爲邦本所宜加意培養者耳

臣自

奉

命撫浙無日不仰體

宸衷務期登百姓於衽席凡貪官

汙吏不敢瞻徇情面稍有姑息所以除民害也獨是逃人一項

爲害甚烈

臣

不敢避紛更定例之嫌爲我

皇上陳之伏惟

定鼎之初嚴立逃人之禁者原爲旗下之人非伍中甲士卽關
中舊人倘被奸民引誘逃遁滿洲莊戶旣無所恃以謀生禁旅
出征更無所用以隨伍故不得不嚴其治罪之條使百姓知懼
不致自陷於法網但立法之始其所逃之人在旗日久舉動言
語易於辨別有隱匿不首者處分宜嚴若近日之逃人辨別旣
難爲害最大他省臣不得知在浙言浙則不禁慘目而傷心也
臣自抵浙受事五日至公所會審逃人日有數起視其人率
皆無賴之徒如鬼如蜮或因借債無償將身折準或係游手好
閒倚旗肆詐或朝賣身而夕逃或甫就獲而又逃其所牽連非
務農黎庶卽納課商賈有因需索不遂而妄扳者有因宿昔小

隙而讐捏者幸而駐防諸臣悉體 聖懷反覆審問如得其情

無不照例懲治然此輩雖經反坐而無辜之人家業生計已蕩
然矣且所逃者非兵丁非舊人不過兵丁之家僕與僱工之奴
子甚有非工非僕但常往來其家而亦冒充旗下者雖見行定
例凡賣身旗下必有里鄰中保甘結地方官用印押契出示曉
諭未嘗不詳且明也然城市居民或能知之至於鄉僻山民住
居寫遠何暇入城控聽既不知其曾否賣身凡素所認識者或
僱而耕耘或倩而負販一經拏獲卽成窩主更有地方光棍欲
詐某家串通逃人先至其門隨率黨羽蜂擁擒捉指爲窩逃頃
刻之間身家皆陷受害之人雖鳴之於官而官畏 功令不得

不盡法嚴訊乃逃人因之愈逞輾轉扳害致百姓日困生業消
亡遺累地方因而凋敝若不亟請 皇上乾綱獨斷分別新舊
另定處分恐 朝廷輸課納稅之良民不足供此輩恣奸肆虐
之魚肉也臣若一日不言 皇上一日不聞 國法一日不更
百姓身家一日不保伏乞 勅部詳議自後凡兵丁舊人有逃
者在內限日報明督捕司在外報明將軍移咨督捕開明年貌
籍貫立寫牌票通行所屬嚴諭地方總甲并移鄰省挨戶查拏
獲則照例治罪凡係駐防處所新買之人逃者如其父兄曾立
賣契又容留隱匿是爲明知故犯罪仍坐窩其餘誤留者槩行
免究庶新買之人不得與關東舊人同例則天下百姓永受

皇恩又不特賑一方之水旱免一年之災傷可比也

請察土地以除積弊疏

具官

臣范承謨

謹

奏康熙七年八月初二日准戶部咨云浙

省十一府七十六州縣實共丈出地塘等項一千四百八十三頃八十二畝有奇清出人丁一萬九千九百三十五丁二項共增銀六千二百八十七兩有奇增米三千五百二十一石有奇又杭州等十衛所共丈出塘蕩九百畝有奇增銀八十三兩五錢增米八石一斗有奇應於本年照例起科徵收解部但州縣衛所丈缺田地等項並未開明因何虧缺且海寧石門武義龍游雲和景寧等六縣虧缺田地人丁較各縣爲多温州台州海寧三衛缺少田地或稱水衝或稱有額無田仍請 勅該部撫

逐一查明具題

臣

卽檄行察報今據温州衛呈稱案照奉文清

丈温州衛屯畝其中缺額無田不合衛總者多及查全書額載
屯田三萬二千六百三十四畝九分原自明萬曆二十五年奉
文清丈將丈出補缺外仍缺坍江無補額田一千四百畝七分
彼時各官以屯田所徵籽粒之糧卽充衛派城守各丁之月餉
不過年終造冊核銷軍無輸納之艱官無參罰之累通融酌議
遂將實缺額田一千四百餘畝派灑粟田之內自明季相沿至
今矣故各丁承領實種田畝所收籽粒不足納糧以至節年逃
亡屯糧壓欠任事印官歲懼參罰今奉文清丈屯畝若以實缺
之田虛加弓口分數不惟有悖 明旨而子遺窮軍安可復貽

之累

臣

察部駁清丈一案各州縣虧缺及數目不符歷經

臣具

疏題覆外惟是溫台海三衛缺額田一千四百畝有奇自故明萬曆年間丈缺均攤相沿賠補足額前清丈冊內不便虛列弓口是以衛總原額下註明坍江之數而見在實徵錢糧仍照舊額無虧其台州衛無徵田八千六百有奇除逃民歸業認開外實在衝坍無存并倉衛塲基無徵田共三千四百七十五畝有奇又海寧衛沿海潮水衝沒地蕩五百七十四畝有奇皆係實缺無徵故該衛丈冊註明水衝及有額無田而歷年徵收錢糧仍照舊額並無虧缺但海澨殘丁賠納維艱應否可與開除統

候

睿鑒勅部議奪

...

...

...

...

...

...

...

...

...

...

請踏勘荒田疏

具官

臣范承謨

謹

奏

臣

擬於本年三月二十五日前往台溫

等府縣衛踏勘坍荒地畝曾經題報在案

臣

今減從裏糧於各

報坍荒之處窮谷溪山必爲親到須查核者必博問查核應丈

量者必按抽丈量台溫二府勘核已畢處州所屬纔勘青田景

寧雲和龍泉四縣旋准總督臣劉兆麒咨文奉有會議

勅諭

臣卽星夜遄歸與督提二臣從長會議逐款條對合疏密題惟

是踏勘之事未完仍當復往處郡但目今杭州嘉湖三郡各縣

異常水災嗷嗷待拯

臣

思處衢已定之荒坍尚可緩勘而嘉湖

目前之災厄急須賑援雖前准部文有以後災傷不許督撫親

勘之禁自應遵守但石門縣海寧衛所原有荒坍包賠田地亦
須親往查看而嘉湖被災各邑壤地相連又係經由便道今臣
減從馳往就便看視一以查核災傷一以賑救護恤務期有以
仰慰 皇上視民如傷之意也而其所爲跼蹐靡寧者臣才短
質庸荷蒙 簡任不能宣布德意以致上干天和下貽民災特
煩 睿慮愆涖罪重負 國負民伏乞 皇上立賜罷斥以警
曠官庶庸臣不致竊位而百姓漸見得所矣

請買穀平糶疏

具官

臣范承謨

謹

奏竊照嘉湖杭紹四府被災雖有輕重而

小民總無儲蓄嗷嗷待哺拯救似難刻緩

臣

雖代爲請蠲免請

折漕稍甦其困然有田者耕種三番車戽之工已竭無田者貧

無半菽將成溝瘠之捐設非買米急救何能暫延喘息除勸諭

鄉紳富民及各官捐助並罰贖米穀通發備賑外更令災民墾

除荒淤急種菜麥以備來春

臣

心已殫惟是民多米少雖目前

稍可支吾至冬必竭非預爲之計米穀一盡民必流亡彼時雖

議招議賑恐無及矣

臣

再四圖維惟量發司庫存留銀兩遴選

能員前往江楚等處採買米穀照價平糶得價之後照數還庫

民免炊珠之歎官無仰屋之嗟救荒良策莫此爲善更請
下權關守隘等官毋得苛稅阻撓庶百萬之生機可延而
廷不蠲之蠲 恩同天地矣 勅

請開事例救荒疏

具官

臣范承謨

謹

奏竊照嘉湖等郡慘被異災

臣

既請蠲請

折請暫發庫銀採買平糶冒瀆

宸聰者至再至三矣乃更有

不得已而代民呼籲者則無田無產至窮之民必不可不賑也

臣

竊仰見

皇上軫念淮揚水災旣一槩蠲除復行賑恤且

特遣大臣撫視安集誠以至仁如天大智如神灼見民爲邦

本賦由民出不惜目前之小費遠計後日之輸將故斷然行之

不疑耳今蠲折平糶之請固邀

皇恩然所蠲所折者皆係有

田之家而未嘗及於佃戶與窮民也此等之民最多最苦但顧

目前之性命不惜後來之犯法無恒心誠可憐可畏

也今雖議蠲矣而此等之民無糧待蠲今雖議折矣而此等之民無糧待折雖請買米平糶矣而此等之民囊無一錢亦不能糶是至貧至苦之民反不能霑朝廷涓滴之澤非大賑濟斷難安生臣再四圖維無如推廣援納之例省公帑而惠民生爲至計也向者直省開援納之例用以賑濟饑民業已行之有效矣但部臣拘於不爲例之旨故嗣有請者槩覆不允頃以河工關係甚重皇上又復斷然行之豈非時有緩急事有輕重惟聖人能達權通變於未窮乎夫河工一項旣破例行之今窮民哀呼之狀似更有急於河工者安忍立視其死散而不爲之請命乎伏乞皇上乾斷獨行准照直隸山東河南賑濟饑